



## Terenga 4: Hōtaka 6 - Te pūtake i puta ai tētehi āhua

### He Mihi

Koinei te reo tāwhiri o Ako te toro atu nei ki a koutou kei ngā papakāinga huri i te motu. Nau mai kia titia ō tātou pūtiki ki te raukura o te reo.

### Hei Mahi Whakarongo

He waiata te kiriata poto o te rangi nei hei tō atu i ō tātou whakaaro ki roto i te kaupapa reo o te rā. Anei ngā pātai hei whakautu mā koutou:

1. Mō ā whea waiatahia ai tēnei waiata?
2. I piri te aha ki te aha?
3. He aha te rerekē o 'Hei konei' me 'Hei konā'?

### He Whakamārama

Tirohia ngā wāhanga o te whakatakotoranga e whai ake nei e tohu ana i tētehi **āhua** i puta mai i tētehi **pūtake**.

**Nā** te aroha i piri ai te rongomau ki tēnei whenua.

Te **āhua** i puta mai: I piri te rongomau. (ka noho ki waenga i te 'i' me te 'ai')  
Te **pūtake**: te aroha (ka noho ki muri i te kupu 'Nā')

Tirohia ēnei rerenga kētanga mena he rerekē te wā i puta ai te āhuatanga:

Nā \_\_\_\_\_ i \_\_\_\_\_ ai ... (wā hipa) **Nāna i pakari ai tana whānau.**

Nā \_\_\_\_\_ e \_\_\_\_\_ nei ... (wā tū) **Nā te Kōhanga Reo e ora nei te reo Māori.**

Mā \_\_\_\_\_ e \_\_\_\_\_ ai ... (wā heke) **Mā te tuakana e tōtika ai te teina.**

### Hei Mahi

Tirohia ngā **āhua** me ngā pūtake e whai ake nei. Hangaia he rerenga kōrero e tīmata ana ki te 'Nā', ki te 'Mā' rānei hei whakamahi i ngā kupu:

1. kaumātua / mau
2. hoa / manawareka
3. mahi tahi / tutuki
4. whakamā / matakū
5. tūrangahakoa / rata

### Whakautu:

1. Nā ngā kaumātua i mau ai ngā kōrero o te hapū.
2. Nā aku hoa i manawareka ai a Pita.
3. Mā te mahi tahi e tutuki ai ngā whāinga.
4. Nā te whakamā i matakū ai te ākongā ki te kōrero.
5. Mā te tūrangahakoa e rata ai ngā tamariki.